

云何諸法徧計所執相？

謂一切法假名安立自性差別

乃至為令隨起言說

云何諸法依他起相？

謂一切法緣生自性

則此有故彼有

此生故彼生

謂無明緣行

乃至招集純大苦蘊

云何諸法圓成實相？

謂一切法平等真如

於此真如諸菩薩勇猛精進為因緣故

如理作意無倒思惟為因緣故乃能通達

於此通達漸漸修習乃至無上正等菩提方證圓滿

云何諸法相無自性性？

謂諸法徧計所執相 何以故？

此由假名安立為相

非由自相安立為相

云何諸法生無自性性？

謂諸法依他起相 何以故？

此由依他緣力故有

非自然有

云何諸法勝義無自性性？

謂諸法由生無自性性說名無自性性

即緣生法亦名勝義無自性性 何以故？

若是清淨所緣境界我顯示彼以為

勝義無自性性依他起相非是清淨所緣境界

是故亦說明為勝義無自性性

復有諸法圓成實相亦名勝義無自性性何以故？

一切法法無我性名為勝義亦得名為無自性性

是一切法勝義諦故無自性性之所顯故